



SchössliTimes

Ussgob 21

September 2016

„Zwüschesaison“

In dere Ussgob:

Generalversammlung	1
Bärefels Waagetau / Termine 16/17	2
Aescher Fasnacht	3
Basler Fasnacht	4
Love is in the air...	5-6
Bummel	7
9mol entweder oder.../	8

Schowieder isch über e halbs Jahr vergange sit mr z'Aesch am Sunntig Morge ufem Schueli igstande sind. Basler Fasnacht, dr Bummel, d' Lämpesitzig und d'GV sind denn au no ufem Plan gstande. Nid vergässe d'Neumitglieder Sitzig. Denn au das Jahr hets wieder e paar Abgäng bi de Schösslis gäh... und im Gegezug glaub genau glichviel Neuzuegäng. Sowit me das cha beurteile nach dr erschte Zit im neue Vereinsjohr wird das passe!!!

Au wenn mr jetzt in dr Johreszit sind wo me noni unbedingt an d'Fasnacht dänkt, sind d'Schösslis scho wieder voll im Probealltag acho und händ au scho dr erscht Probesamschtig hinter sich brocht. S'gilt neu Lieder izstudiere, Neumitglieder z'integriere und dr eint oder ander Intsrumentewächsel zvollzieh! Und denn isch do natürlich no dr Wächsel ufem Majorsposchte. Merci

Mario für die viele super Johr mit dir ganz Vorne!!! Und am Bluscht wünsche mr e guete Start in dr neue Uffgob!

Es isch chli e speziells Vereinsjohr wo do uf uns wartet. D'Vorfasnacht wird für d'Schösslis komplett andersch dehär cho wie mir uns das gwohnt sind. Mir wärde nämlich nid durch d'Schwiiz toure, sondern sind agfrogt worde, ob mir nid am Mimösli im Häbse Theater wänd mitmache. Nachdäm dr Vorstand das Thema uffgnoh het und sich das ganze mol agluegt het, hän sich d'Mitglieder Gedanke gmacht und als Verein hämmer denn entschiede, am Mimösli teilznäh! Es wird sicher e spannendi und intensiv Zit und e tolli Erfahrig... jetzt wüessed Ihr ämel, weli Basler Vorfasnachtsverastaltig Ihr unbedingt bsueche müend ☺

Immer ufem laufende uf:

www.schloessli-schraenzer.ch

Matti-Babbe-Fischi

Generalversammlig 08.04.2016

Wie gwohnt simmer vom Luki als Präsident begrüesst worde. Zimli als erschts hämmer drüber abgstumme, dases au näggschti Fasnacht e neus Kostüm gäh wird. Mittlerwiile wüsse mr au was... aber das isch natürlich no sträng gheim ;-)

Wie gwohnt hämmer e Rückblick, in Form vo de Bricht vo de einzelne Komissionen, übers vergangene Guggejohr becho. D'Bricht sind abgnoh worde und mir sind witer im zum Kassebricht. Wies nid anderscht z' erwarde gsi isch het dr MR wieder ganzi Arbet gleichte und es het keini Iwänd zum Kassebricht gäh! Wie immer hämmer uns au das Johr vo Mitglieder müesse verabschiede. Langjärgi Mitglieder wie dr Cholbe, dr Schölle, dr Jessy und dr Germano hän sich zämme mit em Béhé, dr Ursi und em Fiume verabschiedet. Uffgnoh worde als Aktivmitglieder sind dr Cueni, dr Ciccio (eimol meh ☺), d' Celine, d' Nicole und dr FaFI. Härzlich Willkomme! Dr Räschte vo de Traktande sind speditiv abgarbeitet worde und d'GV isch nach rekordverdächtige 105 Minute beendet worde!

Matti-Babbe-Fischi

20 Joor Bärefelswaggis

Au in däm Joor sind mir für d Waageiweiwig bi unserne Fründe de Bärefelswaggis iglade gsi. 2016 isch für die Truppe e speziells Joor gsi – sie händ Ihres 20 Jöörige bestoh gfiert.

Uf die halb 2i händ mir uns ufem Fiechte Parkplatz z Rynach troffe, händ d Instrument vom verägnete Fasnachtsdaag in Brunne widr Flott gmacht und sind spielend Richtig Buurehof glofe, wo dä Waage gstande isch. Mit ere Wurst und öbis z`Drinke in dr Hand händ mr dä Waage bestuunt, wo die Männer für Ihres Jubi baut hän. Hammer Burg hämmer z`gseh becho und jedes Jooressujet isch im e Kaste präsentiert worde, bis uf eine, do hän d Schlössli e Ufgoob becho – Mir hän dörfe aktiv am Waagebau teilneh und händ unseri Fründschaft in däm freie Block dörfe präsentiere. Dr ganz Nomidaag hän mir mitere Polaroid-Kamera Föteli vo uns gmacht und die in unser Projekt im Wöschleineprinzip ufkhängt miteme hammer Hindergrund, wo de Fafi bi sich im Gschäft druckt het. Nach däm mir uns Verpflägt hän und Föteli gschosse worde sind, hän mr die Waageiweiwig musikalisch unterhalte. D Stückli hämmer zu unserem beste geh, do isch au d`Vorfreud ufe Sunntig richtig gstiige. Fertig mit em musikalische Uftritt, händ Neumitglieder vo uns (dr Fafi, Ciccio, Céline, Nicole und ich) d Taufi vo de Bärefels becho mit däm super feine Schnapps. Do sich au bi de Wägeler e neue versteegt het, isch dä natürlich au vo de Schlössli tauf worde. De Teil het dr Brüggi und dr Nicolet überno. Es het geh: Schwimmring, Schwimmflügeli und e Glocke ume Hals, mit dere er jede Schlössli an dr Aescher Fasnacht het miese begriesse, wenn er eim übere Wäg glofe isch. Nocher sind die einte no gmietlich sitze blibe, die andere sind d`Rynacher Fasnacht go bestuune und wiederum anderi hän vermuettlich die ganz Nacht dört verbrocht und sind direkt am Sunntig an Träffpunkt kho.

Kevin



Schlössli-Schränzer Termine 2016/2017

08. Oktober	Motto Party im Lokal
22.-23. Oktober	Guggeweekend (intern)
28. Oktober	Eröffnung der umgebauten MZH Löhrenacker
11. November	Episode 11.11 / Häxeschränzer Gebenstorf (AG)
19. November	Heimspiil
07. Januar	Blaggeddeusgoob
14.-31. Januar	Mimösli

Aescher Fasnacht 07.02.-09.02.2016

Juhuu, endlich Sonntagmorgen.. Die Spannung steigt. Bald ist es wieder so weit, rein ins neue Kostüm und los geht's an die Aescher Fasnacht. Leider hat Petrus heute nicht die beste Laune. Es regnet. Natürlich kam dies für uns nicht ganz überraschend. So trugen eine Regenjackenaktion und das schlechte Wetter dazu bei, das die Schlässlis, in der Woche vor der Aescher Fasnacht, sämtliche Landis in der Region stürmten und statt in blau weiss gestreift, in knall gelb beim Pfareiheim eintrafen.

Der Regen hielt uns natürlich nicht davon ab, einen üppigen Passivenapéro vorzubereiten. Trotz des Regens fanden einige den Weg zu uns und konnten sich über eine Stärkung vor dem Umzug freuen. Kurz nach 13h00 starteten wir und machten uns auf den Weg zum Schulhausplatz. Dort angekommen kannte der Himmel keine Grenzen mehr und die Versammlung auf dem Platz verlagerte sich grösstenteils unter die Schulhausdächer. Trotz Regen startete der Umzug pünktlich um 14h00. Viele Besucher fanden trotz des schlechten Wetters den Weg nach Aesch.

Auch in diesem Jahr begleiteten uns wieder unsere Jüngsten welche als Vortrab fleissig Material an die Zuschauer verteilten. Es war trotz Regen ein sehr schöner Umzug.

Nach dem Umzug ging es auf den Strassen von Aesch weiter. Wir durften unter anderem bei unseren Freunden den Bärefels-Waggis welche das 20 jährige Jubiläum feierten, und den Chatzebuggler spielen. Nach weiteren Auftritten in den Beizen und auf der Strasse, fand dieser Tag seinen musikalischen Abschluss traditionell auf der Mühlistäge. Bei den Chatzenbuggler in der Schöpfli-

bar, auf den Wagen und in den Beizen ging für einige von uns die Fasnacht noch bis in die frühen Morgenstunden weiter.

Am Montag erwartete uns der Obestreich. Wie im Letzten Jahr hat das Comité einen Auftrittsplan vorbereitet. So wissen die Fasnächtler wann und wo wer spielt, oder welcher Schnitzelbank wo singt. Dies hat zu vielen positiven Reaktionen geführt und wurde deshalb auch so weitergeführt. Um die Leute gemeinsam abzuholen war ein Fackelumzug durch Aesch geplant. Leider viel dieser Umzug, im wahrsten Sinne des Wortes, ins Wasser. Nichts desto trotz ging die Fasnacht in den Beizen von Aesch weiter. Natürlich durfte unser Abschluss auf der Mühlistäge auch an diesem Tag nicht fehlen.

Der Dienstag startete wie jedes Jahr in Pfeffingen am Kindermaskenball. Mit den Bärefels-Waggis, den Pfluume-Pfupfer Pfeffingen und vielen freudigen Kindern liefen wir einen kleinen Umzug durch Pfeffingen, welcher in der Mehrzweckhalle endete. Dort ging der Spass weiter. Die Bärefels-Waggis hatten für die Kinder wieder lustige Spiele vorbereitet welche mit viel Ehrgeiz gemeistert wurde. Natürlich gab es für alle einen kleinen Preis. Eins spassiger Nachmittag für gross und klein.

Unterdessen liefen in Aesch die Vorbereitungen für die erste Schluuchete auf Hochtouren. 17 Guggen verteilt auf 4 Bühnen erwartete die Besucher von Aesch.

Leider meinte es Petrus auch heute nicht sehr gut mit uns und gab alles. Aber trotz Gewitter, Sturm, Hagel und allem was sonst noch vom Himmel kommen kann, liessen sich die Besucher und Musiker den Spass nicht verderben. Viele fanden den Weg nach Aesch und waren von den doch zum Teil etwas anderen Guggentönen begeistert. Die Erste Schluuchete war trotz des Wetters ein riesen Erfolg. Leider bedeutete dies, dass das Ende der Fasnacht schon wieder näher kommt. Nach unserem Auftritt auf der Mühlistäge trafen wir und mit den Bärefels-Waggis um die Fasnacht zu verabschieden. Gleichzeitig durften wir 2 neue Erdenbürger begrüßen. Auf diesem Weg nochmal alles Gute an Roger und Fränzi. J Nach einem natürlich verregneten Endstreich war die Aescher Fasnacht leider schon wieder Geschichte. Jetzt fängt die Vorfreude auf die Fasnacht 2017 wieder von vorne an. J

Nicci



Basler Fasnacht 16. Februar 2016

Wie immer die letschte Joohre hämmer uns am früehere Nomitag bim Kantonsspital troffe. Nach e paar Täg wo mr händ chönne tröchne und mir uns erholt händ, simmer nomol so richtig parat gsi füre super Fasnachtstag z'Basel. Nachdäm alli itroffe und parat gsi sind, simmer igstande und richtig Storcheparking gloffe, wo mr uff dr Stäge näbedra e erschts Platzkonzärt gäh händ. Wie sich das ghört z'Basel natürlich die ganzi Zit mit Larve ufem Grind. Wobi mir in däm Joahr uffgfalle isch, dass immer meh basler Guggene das gar nid ihalte und d'Larve nachem erschte Liede abziehn. Jänu... „Wasser predige und Wyy suffe...“ oder wie isch das gange ☺

Mir sind nachere erschte Pause witer, über die Mittleri-Brugg ufe Kasärneplatz, wo mr wie die letschte Johre au scho vo dr Waageclique Ammedysli erwartet worde sind. Sie hän in däm Joahr ihres 70 (!) Joahr Jubiläum gfiirt und ihre Waage isch e riise Schluuchboot gsi... nei, s'Sujet het nüt mit River-Rafting ztue gha... und Sie händ au nüt verteilt vom Waage... sonder nur Sache vom Publikum entgegegnoh. Mit eme Ständeli hämmer ihne denn no wie sich das ghört gratuliert. Mir händ gnueg lang Zit gha zum d'Wäage und d'Requisite ufem Platz azluege und dr einte oder andere Gugge zuezloose. Witergange isches denn in richtig Claraplatz, beziehigswiis untere Claraplatz. Dört hämmer uns in dr Rätzstadt mit eme Znacht füre Obe und für d'Nacht gstärkt. So spiile git nid nur durscht, sondern natürlich au hunger! Will im Warme sitze müed macht, sind die meischte Schlössli gli wieder uffe an d'Luft und händ sich chli am muntere Fasnachtstriibe hiigäh. Es isch doch einiges los gsi und es het gschränzt und gchesslet in de Stroose und Gasse. Mir sind denn für eimol nid über d'Wettsteibrugg zurgg ins Grossbase,l sondern über die Mittleri Brugg in Richtig Hotel 3 König. Dört hämmer in dr Brasserie e Ufftritt gha. Mir händ nid so genau gwusst wie das so wärde wird. Aber es isch scho wo mr ihne gloffe sind e super Stimmig im Saal gsi! Und wo mir agfange händ mit spii-le isch d'Meuti fascht übere kocht ☺ es isch e super Ufftritt worde mit grandioser Stimmig, gueter Luune und super Sound! Mir sind eigentlich komplett unkoordiniert im ganze Saal verteilt gsi... und trotzdäm hämmer e mega Ufftritt ahneglegt! S'isch richtig abgange und mir händ natürlich zum Abschluss als Zuegob dr Wanderer ahnetrötet!


Mir sind denn witer im Grossbasel ummezooge und händ no s'eint oder andere Platzkonzärt in de Gasse zum beschte gäh! Natürlich hämmer au immer wieder gnueg Pause gha, zum öbbis go trinke oder eifach d'Fasnacht uff dr Strooss z'gniesse! Wär uns kennt dä weis, das mir hinde bim Steineparking uf dr Stäage immer unser Abschlusskonzärt gänd. Au das Joahr hämmer uns um die 1 am Morge dur d'Steine kämpft, was gar nid so eifach gsi isch... will d'Beize usegstuehlt gha händ und uns ei Gugge nach dr andere krützt het. Uff dr Stäge acho, hämmer voreme grosse Publikum unsers letschte Konzärt im Kostüm für die Saison gäh. Alli händ nomol vollgas gäh und es isch e super Abschluss gsi vonere eimol meh grandiose Fasnacht wo mir Schlössli zämme händ dörfe verbringe. Nachdäm d'Instrumänt versorgt gsi sind, händ sich die wo noni Heime sind, wieder ins Getümmel und in d'Cliquechäller gstürzt. Schiins hets au das Joahr wieder Schlössli gäh, wo erscht heime sind, wos langsam hell worde isch und die erschte Vögeli pffie hän...

Matti-Babbe-Fischi



Hochzit Baumi und Nicole

D'Schlössli wärde älter und „vernünftiger“ und hürote :-) Am 11. Juni hän dr Fabian und d'Nicole in Therwil ghürote. Mir hän die Zwei an ihrem Tag bim Apero mit eme Ständeli „überrascht“! Alli Schlösslis wünsche Euch zwei numme s'Beschte uf eurem gmeinsame Wäg!



Hochzit Seiler und Susanne 01. Juli 2016

... und wills so schön gsi isch... Gratuliere mr au am Martin und dr Susanne no uff däm Wäg zu Ihrer Hochzit. Natürlich isches jedem Schlössli au bi ihne e Ehresach gsi, musikalisch go gratuliere! Au Euch wünsche mr natürlich vo Härze numme s'Beschte!!!



Bummel

Als Abschluss vo de Fasnachts-Saison isch unsere Bummel am 28. Februar 2016 ufem Programm gstande.

Voller Vorfreud hän mr uns am Sunntig, frieh am morge, im Lokal besammet. Dos weder e Zmorge no e Aperogä het sin mr grad ufbroche und sin spielend an Bahnhof Dornach marschieret. D Lyt wo ungläubig und verschlofe us de Fenschter usegluegt hän, hän herrlich usgseh!

Z Dornach sin mr ufe Zug richtig Basel. Wo mr z Basel ako sin hän mr feschtgstellt, dass es immerno weder e Zmorge no e Aperogit. Denn hän sich gwüssi Lüt, i weiss nymm wär, miesse selber organisiere. Me isch in Coop am Bahnhof gange und het feschtgstellt, dass e Amarone Aktion isch. Und da me e guete Amarone nid ka us Plastikbecher drinke het me kurzerhand no Gläser und e Zapfezieher kauft.

Was i mitbeko ha isch de Rotwyy wirklich e guets Dröpfli gsi. Gwüssi Aggtivmitglieder, drunter au ich, hän sich ab dem Triebe allerdings verwunderet d Auge grieve.

Wo sich denn au die andere selber verpflegt ka hän sin mr wieder in Zug gstiege und richtig Rhyfælde gfare.

Dört ako, sin mr richtig Fäldschlössli gloffe und villi hän sich scho ufe Fierig und e kiehls blonds gfreut. Doch weit gefehlt. Mir hän e Ständeli gspielt und sin denn ins Restaurant Fäldschlössli. Dört het uf uns e riichhaltigs Brunchbuffet gwartet. Es het wirklich alles gha, was s Härz begehrt het. Zum drinke hets Kaffi, Tee, Mineral, Säft und tatsächlich au Amarone gä, obwohl dä um einiges tüürer gsi isch als im Coop am Bahnhof. Trotz de hoche Priise hän sich witeri Aggtivmitglieder dem Rotwyytribe agschlosse und grad none zweiti Fläsche bstellt.

Wo sich alli wohl gnährt gha händ, het uns dusse de Car in Empfang gno und mir sin richtig Kartbahn uf Badisch Rhyfælde übergefahre. Die ganzi Bahn isch fyr uns reserviert gsi und mir hän einigi Rundene könne draie. Es hän sich villi interessant und halsbrecherischi Duell ereignet. Selbstverständlich hän sich die, wo grad nid gfare sin mitem einte oder andere kiele Getränk könne stärke. Und me glaubts fascht nid, aber uf de Kartbahn in Rhyfælde hän si kei Amarone ka!

Nochem abschliessende Konzertli direkt uf de Kartbahn het uns denn de Car wieder in Empfang gno und zrug an Bahnhof gfare. Wo mr wieder zrug in Basel ako sin hets au scho agfange ydunkle. E paar schlau Füs sin numol kurz in Coop und hän numol e Fläschli Rotwyy kauft. De Amarone isch komischerwiis usverkauft gsi und drum hän si ufe Barolo zruggriffe. Eineweg, s isch langsam Zyt worde richtig Bankverein zlaufe. Doch das hän mr nid uf direktem Weg gmacht. S Bummel OK het als letschti Stärkig no e Aperogä in de Henric Petri-Stross organisiert.

Wo das Buffet au leergfäggt gsi isch sin mr richtig Ymündig Freie-Stross gloffe. Mir hän gar nidemol so lang miesse astoh und hän denn könne gnüsslich d Prachtsstross vo Basel abedefiliere. D Akzeptanz vo de "Ländler-Gugge" in Basel stiggt mines erachtens vo Joohr zu Joohr. Obwohls au das Joohr durchus au wieder skeptischi Blick gä het.

Vorem abtrete hän mr e Konzert ufem Barfi gä und hän die letschte Fasnächtliche Kläng ufgsooge. Abschliessend sin villi hei, anderi sin no witerzoge und sich no ei-zwei Schlumberbächer gönnt.

Jetzt blibt mr nur no em Bummel OK e Danggschön uszspreche fyr dä super organisierti Bummel!

Übrigens die beschriebeni Rotwyyfraktion het denn am Mäntig e kli Mieh gha mit schaffe. Hani ghört!

MR

9mol entweder oder mit... Marc-Roman « MR » Fasoli

Zoggeli oder Schueh?

Definitiv Zoggeli!

Konfetti oder Röppli?

Definitiv Röppli

Harlekin oder Waggis?

Beides super Figure, aber i bevorzug
de Waggis

Guggemuusig oder Waggiswaage?

Do enthalt i mi! Beides het Vor- und Nochtail

Schnipo oder Hörnli mit Ghacktem?

Hörnli mit Ghacktem

Vorne im Car oder hinde im Car?

Im Car gits nur ei Reihe fyr mi! Die
Hinderschti, döt wo d'Poscht abgoht!

„Wanderer“ oder „Elton“?

Mittlerwile muessi de Elton bevorzuge
(Hätti nie denkt ;-)

Polonaise oder „Line Dance“?

Line Dance, wenn mrs nid inflationärvil
mien mache

Kaffi Lutz oder Bier?

Kaffi Lutz zum Ufwämre vorem Ufftritt
Bier zum de Durscht lösche nochem Ufftritt.



**Leserbriefe, Inseratenbestellungen, Artikel,
Anregungen, Kritik, Lob etc. an:
info@schloessli-schraenezer.ch**

**Merci beschtens
Matti-Babbe-Fischi**

www.schloessli-schraenezer.ch